

Kommunit aqqissugaanerisa allannguutaat pillugit Naalakkersuisut nalilersuinissamik suliaqaqqullugit peqquneqassasut Inatsisartut aalajangiiffigisassaattut siunnersuut. Aqqissuussaannermi allannguutaasimasut pitsaaqutai ajoqutaalu nalilersorneqassapput, sumiiffimmilu demokratiimut kommunillu aningaasaqarnerannut sunniuteqarsimansoq, kiisalu allaffissornikillisaaniarnermut siunertaasimasoq piviusunngortinneqarsimansoq nalilersorneqassallutik. Nalilersuineq UPA2024 nallertinnagu Inatsisartunut agguassorneqassaaq.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Isumaginninnermut, Suliffeqarnermut, Nunamullu Namminermit Naalakkersuisoq)

Siullermeerinnineq

Siunnersuuteqartup Aqqalu C. Jerimiassen, Atassut siunnersuutaanut Naalakkersuisut qujapput.

Siunnersuuteqartup siunnersuummini kommunit aqqissugaanerit pillugu annertuumik siammasissumillu nalilersueqqinnissaq pillugu aalajangiiffigisassatut saqqummiussaqqarpoq. Kommunit aqqissugaanerit pillugu arlaqartunik nalilersuinernik nalunaarusianillu saqqummisoqareerpoq. Uani innersuunneqarput kommunit tamakkiisoq isigalugu nalilersuinerit pioreersut¹ aammalu nalunaarusiaq².

Naalakkersuisut aallussinerat uaniippoq aalajangiisinnaanermik oqartussaassuseq aammalu ingerlatsineq ataatsimoortinneqassasut, innuttaasunik kiffartuussineq pitsaanerulersissinnaajumallugu.

Naalakkersuisut ukioq manna 7. aamma 8. septembari inoqarfiit pillugit Ilulissani ataatsimeersuartitsipput, tassanilu oqariartuutit ilagaat inoqarfinni mikinerusuni ulluinnarnut tunngasunik aamma pisinnaatitaaffimminnik qitiusumik pisortaqqarfinniit paasissutissanik amigaateqartarnertik ujartuiffigigaat. Tamanna qanimut oqartussaaqatigiinnerup pingaarutilittut ilagivaa, oqartussaasoqqarfinnit tamanit iliuuseqqarfigineqarsinnaasoq.

Naalakkersuisut pingaartitaraat kommunit namminneerlutik aqqissugaanertik ataavartumik nalilersortuassagaat, taamaalilluni kommunit innuttaasuminnut sullissineri ullutsinnut naapertuuttuarniassammata, taamaaliornikkut aamma innuttaasut pisortat allaffissornikkut aqqissugaanerit qanoq isumaqqarfigineraat tusaaniarneqartarnissaa anguniarlugu. Tassani ilaatigut oqaluserineqarsinnaavoq innuttaasut pisortat allaffissornikkut aqqissugaaneranut kissaataannut kommunit peqatigiiffeqannginnerat aporfionersoq. Tamatuma saniatigut Borgmesterit tamarmik Naalakkersuisullu aqqissuussaaneq pillugu ataavartumik eqqartueqatigiittassapput.

¹ I – *Iuarsaaqqinnissaq pillugu nalilersuineq – Aningaasatigut allaffissornikkullu kingunerisassat.*

II – *Namminersorlutik Oqartussanut nalunaarut – Qaasuitsup Kommuniata avinnissaa.*

III - *Namminersorlutik Oqartussanut nalunaarut – Kommuneqqarfik Sermersuup avinneqarnissaa.*

² *UKA2017-mut nalunaarusiaq kommunini aqqissugaanertigut, ingerlatsinikkut aamma innuttaasut qanimut tamat oqartussaaqataanerannut atugaat, aamma inuuniarneq, kulturi, inuussutissarsiorneq aningaasaqarnerlu.*

Naalackersuisut qanimut oqartussaaqatigiinneq pingaartitaraat. Taamaattumik Naalackersuisut sinnerlugit tamanna Naalackersuinikkut Ataqatigiissaarisoqatigiit ataatsimiinnissaanni tullermi, Naalackersuisut borgmesterillu tamarmik peqataaffigisaannik ingerlanneqartussami, eqqartugassatut qaqinnissaa pilersaarutigaara. Ataatsimiinnissaq tamanna kingusinnerpaamik februar 2023-imi pissasoq naatsorsuutigaara. Qanoq kommunit allaffissornikkut aqqissuussaanerat aammalu qanoq iluseqarnissaanut tunngasut pillugit kommunit namminnek kissaataat aallaaviujumaarput, Naalackersuisullu Borgmesterit ataatsimoortillugit ataavartumik oqaloqatigineqartarnissaat pingaartitaraat.

Naalackersuisuttaaq aalajangiinerit annertuut aalajangiiffiginissaat pitinnagu innuttaasut annertunerusumik peqataatinnerisigut oqallitsinnerisigullu kommunini ataasiakkaani aalajangiinerit pisassasut pingaartippaat.

Iluarsaaqqinnikuuneq pillugu nalunaarusiat arlallit nassuiaallu, iluarsaaqqinnikuunerup pitsaaqutanik akornngutaanillu ersersitsisut tunngavigalugit, taakkulu tungaannut aningaasanik atueqqittariaqannginneq aallaavigalugu Naalackersuisuniit siunnersuutip itigartinneqarnissaa inassutigaarput.